

Ok ensullen neyne utlude, de in der stad nicht enwonen, selschap hebbin an bruwende mit denjennen, de in der stad wonen. Item tabernere^{a)} unde hokere sullen nicht bruwen.

Item so ensal neymant bruwen, he enhebbe sin hernasch, als ome dat de rad gesat hefft, unde dat sal he wisen des sondach neist darvor, so he bruwen wel, unde sal in syne eyde nemen, dat solk harnasch sin eygen sii.

Ok ensal neyn borger edir medewoner harnasch verkopen sunder weten des rades, he enwete edir hebbe betir harnasch in des stede.

Ok^{b)} ensullen de bruwere de pannen neymande oversetten, he enhebbe eyn eygen gud kolevat, unde neymant sal deme andern des weygeren to lenende, unde dat darmede to verlenende in der neyberschap holden, als de rad vor tiiden gesat hadde.

Item^{c)} so sal eyn jowelk, de dar bruwet, eyne ange leydern hebben, de an sin dak wende, des gelik sullen ok dejenne, de dat vermoget unde nicht bruwen, leydern hebben.

Ok^{d)} so vaken, alse eyn bruwet, sal he XII mark¹⁾ verschoten. We ok eyn bermolt verkopet, de sal ok XII mark verschoten, unde we sin bermolt verkopet, sal nicht bruwen unde sal doch to den gesetten des bruwendes verbunden sin mit harnasch, schote unde^{e)} leyderen etc. Ok sal neymant boven sin gesette molt vorkopen sunder II eder dre fertil ane geverde.

Ok we eyne^{f)} gantze wachte hefft, de mach twige bruwen unde nicht mer, eff wol mer wachte ut deme hus ghan.

a) tabernere unde durchstrichen, darüber de. b) Ok biß gesat hadde durchstrichen. c) Am Rande hierzu bemerkt: Non est publicatum. d) Ok biß ane geverde durchstrichen. e) unde und etc. durchstrichen, nach etc. nachgetragen unde kolevate. f) eyne durchstrichen.

1) c. 1360 nur die Hälfte a. a. D. S. 221.